

JA MYIDU'UKPI NØKY MIDI JA JUAN YJAAY

Ja' midi xyikjujky'ajtyindip

¹ Ya'atpi nøky øø nguejxpy, jøts mee ndukmadøy ja Jesucristo, ku ja jaayim wyinaty ku cho'ondakijxy tuktsajp'agida'aky. Nay ja' øø tø n'ixy tø nmadøy jøts nayide'en øø tø ndukpaaty ja ngø' ndeky; yø' y'ayuujk yø' wyinmaa'yin adøm ndajujky'ajtyindip.

² Tø ja ñankñigaxi'igiyi, øøts tø n'ixy øøts tø nnijawi, paty mee ndukmadøy ixyam ku ja ejtp møøt chøøni ja Dios Teety, tøts idø'øn ixyam xnimi'iñindi.

³ Tyiiby i øøts ndyimñigajpxy midi øøts idø'øn tø ndyimy'ixy ndyimyadøy; paty mee ndukmadøy jøts meets m'ett amuki møøt øøts, kumi tyimdyiy tyimyjanch ku øø møøt n'ity ja Dios Teety jøts nayide'en møøt ja y'U'nk Jesucristo.

⁴ Yø'øbi ayuujk yø'øbi winmaa'yin meets ixyam ndanija'ayip jøts yikxon ejtni xoni mwinmaa'ñ y'ettit.

Janch wa'ats ja Dios ejxim ja jajin

⁵ Yø' øøts nnigajpxwampy yø øy'ayuujk yø ømyadya'aky midi øøts ja tø xukmadøy: jøts ku ja Dios Teety janch øy janch wa'ats ejxim ja jajin, jøts niwine'enin ja ka'øy'ajtin tkamøødi.

⁶ Kuts nwaa'ñindi ku ja Dios Teety nmøøt n'ijtyindi jøts nika' n'ukpaduu'na'andi ja n'ayuujk,

nugo adøm ja nmídundigøý adíijchíndi. Yø' idø'øn møj taay ku jade'en nugo nwaa'ñíndi.

⁷ Kuts ndsinaa'yíndit øy wá'ats ejxim ja Dios Teety chøøni, winets nixem niyám tu'ugyi ja winmaa'ñ nmøøt'ajtyíndit, jade'en idø'øn ja y'U'nk Jesús xyikpøkwyaajchíndi midí jaty ndu'uñíndip ku ja wyidsuun wyidajxy.

⁸ Xjats ku nugo nichøky nwaa'ñíndi jøts ku ka' ndundigøø'yíndi, nugo kø'øm nnawyíndaay'ajtya'andi jøts tiy ngakajpxyíndi.

⁹ Kuts ndamimadyakøxíndit ja Dios Teety nbøky, njøp'ejxíndip ja' ku ja ttu'unt midí paat'ajtip, jøts nay ja xpojkpímaa'kxíndip jøts nay ja' jatyí xyikwaaajtsíndip midí jaty adøm ndundigøø'yín'ajtyíndip.

¹⁰ Kuts nugo nwaa'nínt ku ka'ap nbøky nmøøt'ajtyíndi, jade'en idø'øn ja nbíktaajkyíndi jøts ku ja tyaaýi ja Dios Teety, niwine'enínts jade'en ngamímadoo'ja'ant ja kyajpxy ja y'ayuujk.

2

Jesucristo amuum xnikajpxuujtimp

¹ Meets u'nkti una'jkti, ya'at meets ndukmadøøpy tuki'iyi ku ka'ap mbøktyu'undit, jøts pøni pøn wyínaty sa tyimyjajtp paty xnijawídit ku jaa nmøøt'ajtyíndi tu'uk ja níkaajpxutpi jam Dios Teety wyíngujkp, ja Jesucristo dø'øn ja' pøn janch, pøn tiy.

² Tø ja Jesucristo tku'ayo'ombaadi adøm ja nbøky, jøts nígidí adømyípti, níduki'iyi dø'øn nayíde'en ja náxwii'ñit jaay.

³ Pøni nbadu'uñindip ja Dios ja kyutujk sa ja tø xuk'ijxyindi xuknija'wa'andi, jade'en'ampts adøm ja x'u'nkja'wa'ant.

⁴ Jøts pøni pøn wamp ku ja y'u'nk'atyiyi ja Dios jøts nika'ap ja tpaduujniyi ja kyutujk, ja' nugo kajpxigøøpy, nugo ja tyaayi.

⁵ Jøts pøni pøn amumjoojt nadyamidsøky'ajtip ja Dios, ja'ats tpaduujnip ja Dios kyutujk; jade'ents ja yiknijawī ku nwindson'ajtim ja møøt y'ity.

⁶ Pøni pøn tyimwyamp ku møøt tyimy'ity ja Dios, wants nayide'en tyiknaxy samī Jesús tyiknajxy.

Nbadu'unimp ya'at jembyi ana'amin

⁷ Migu'ukti, ka'ap meets ja jemgyutujk ixyam ndanijayi; nay ja' yø' midi mee tø xmadowdi xnijawidi ku ja mdsinaa'yin xyiktso'ondaktøø jadigojk.

⁸ Yø' meets ixyam njaaktukmadøøpy, yø kutujk, midi janch øy janch tump, øgyajemgyutujk, ja ku ja xem ja yam nnachojkindit jade'en sa ja Cristo ttuun, jøts mbaat'ajtiyip meets nayide'en xu'unt. Yø'øbi winmaa'ñ tyikudigøøpy ja ka'ødyunk, jade'ents ja tsinaa'yin y'øyi pyaadi.

⁹ Jøts pøni pøn nugo wamp ku ja tpaduñ ja jemchinaa'yin, yam ja myigu'uk ja tmi'ambikñim tmijotma'atynim, ja ka'ødyunk ja wyinaty pyadun'adichpnim.

¹⁰ Pøni pøn twamp ttsojpk ja myigu'uktøjkti øpyøni, ja' idø'øn tpadump ja øchinaa'yin jøts niwine'enin ja pyøky kyanadyukpaadyi jade'en.

¹¹ Jøts pøni pøn ja myigu'uktøjk tmi'ajkidip, ja' nugo tsinaapy ka'ødyunk agujkpy, ka' tñijawī pøni

ti tyumpy kyajpxpy, jade'en ja wyimbejtñi ejxim ja kugoots jaa'y.

¹² Meets u'nkti meets una'jkti, ixyam mee nnijayi jøts ndukmadowdi ja'agøjxp ku ja Dios Teety tømbojkpimee'kxyidi Jesucristo køjxp.

¹³ Teetyi taakti, nayide'en meets ixyam ndukmadøy ya'at ayuujk kumi tømee xpabiky ja Jesús yja' midi jaayim wyinaty ku cho'ondakijxy tuktsajp'agida'aky. Meets wajtyøjkti meets kiixye'edi, ixyam mee ndukmadøy ya'at ayuujk kumi tømimajada'akti ja miku' yja'.

Nayide'en meets u'nkti meets una'jkti ndanijayi ya'at ayuujk, kumi tøm'u'nk'atyidi ja Dios Teety.

¹⁴ Meets teetyi taakti, jade'en meets ixyam ndanijayi ya'at ayuujk kumi tøm xjanchjpabøjkti ja Jesús yja' midi jaayim wyinaty ku cho'ondakijxy tuktsajp'agida'aky. Nayide'en meets wajtyøjkti kiixye'edi ixyam ndanijayi ya'at ayuujk ku ejtp mjanchmøkwinmaydi jøts ku ja Dios Teety kyajpxy y'ayuujk tøm xpabøjkidi amumjoojt, jøts nayide'en ku tømimajada'akti ja miku' yja'.

¹⁵ Kidi nugo xtsojkti ja pøktyunk ni ja pikta'aky midi ya ejtp naxwiiñ. Jøts pøni pøn t'anømp t'adsojqp ja pøktyunk jøts nika' ja Dios Teety ne'egi ttsøky'aty jade'en.

¹⁶ Yide'en idø'øn ja naxwii'ñit jaa'y tjanchojkti ja pøktyunk midi winmaa'ñjøtpy mee'nxidip, jøts midi tyimchuj'ejxtip tyimchuja'widip. Ja'ats nugo ja pikta'aky nadyamøja'wiyidip, ja' ja nugo pyawinmay'ejttip midi jaty jaa kayak'ødyump ya naxwiiñ, yamts ja Dios Teety ja jade'en tøm tkadanibiktaagi.

17 Windigøopy y'ity midi yikpøkyump ya naxwiiñ, midi nugo yiktsojk anaxp; jøts pøni pøn tpadump sa jaty ja Dios ttsøky, ja'ats y'anmija'win xemikøjxp jujky'atp.

Pøn mibøjkip ja Cristo, jøts pøn ja kamibøjkip

18 Meets u'nkti una'jkti, tø jabaat tpaaty ja et ja xøøw ku myenwa'añ tu'uk ja jaa'y pøn ja Cristo møk myidsep'atwampy, pøn meets nayide'en tønxi jawi xnimadøy; ixyamts nayide'en tøn kyaxø'knidi namay pøn tmidsep'ajttip ja Cristo, paty jade'en yiknijawi ku tøn jabaat ja et ja xøøw tpaaty.

19 Nay adøm nmigu'uk jade'en winaagin adøstip pøn adøm tøn xmajtstuujtyindi paty ja tmidsep'atwa'andi ja Cristo; nigidits ja' pøn adøm nwinmaa'ñ møøt tuknaxti, ku jeexyip ja'adi, tøn ja jeexyip møøt ndaa'ñindi. Jade'en idø'øn yjaty ku winaagin xpuwaajchindi, paty wa'ats yiknijawi ku ka' yikxon tmøøt'atti ja winmaa'ñ sa adøm nja'.

20 Adømts ja Cristo tøn xuktatøjka'andi ja Espíritu Santo, ja'agøjxp ixyam nnija'wa'andi ja tyiiby ja yjanchpi.

21 Paty meets ixyam nnijayi ku xnijawidi midi tiy midi janch, ka'ap ø nwa'añ ku ka' xnijawidi; wa'ats mee xnijawi ku ja tyiiby ja yjanchpi ka' nayide'en sa ja taay.

22 ¿Pønts idø'øn taay'ajtp? Ja'ats idø'øn pøn wamp ku ja Jesús ka' yiknitso'ok'aty. Pø ja'axi tkawamp tkatsojpk ja Dios Teety møøt ja y'U'nk Jesús.

²³ Pøni pøn tkawandip tkatsoktip ja Dios Teety y'U'nk, ja Dios Teety idø'øn wyinaty jade'en kayik-tsojpk; jøts pøni pøn twandip ttsoktip ja y'U'nk Jesús, ja Dios Teety idø'øn wyinaty jade'en yiktso-jkp.

²⁴ Paty øøts idø'øn nnigajpxy jøts xwinmaa'ñ'attit ja øgyajpxy ja øy'ayuujk midi tø xpabøkti jøts midi yajkpy ja øchinaa'yin; pøni mwinmaa'ñ'ajttip yø', jade'en ja Dios Teety jøts ja y'u'nk Jesús møøt n'ijtyindi.

²⁵ Kumi Jesús kø'øm ñi'adso'owi ku ja xmø'øyint ja øchinaa'yin midi xemikøjxp yikmøøt'atp.

²⁶ Ja'agøjxp mee nnijayi ku nugo myikwindaaayidit.

²⁷ Pø tøxi ja Jesucristo mmø'øyindi ja Espíritu Santo, paty ka' pyaat'aty jøts pøn jadu'uk mgajpxwejiyidit, pø ja Espíritu Santoxi mee kø'øm myikwejiyip myikajiyip midi tiy midi janch jøts ka' tyaayi. Meets migu'uktøjkti, jade'en idø'øn y'ejxi tyiyi jøts yikxon mdsøønidit mdanidit amuki møøt ja Cristo, jade'en sa kø'øm mdukjatyidi ja Espíritu Santo.

²⁸ Jøts jade'en wingujk jotkujk njøp'ejx'ejtindit ku ja mye'ent ja Jesús, jøts jade'en ka' nmitsø'ødyu'unindit.

²⁹ Pø tøxi meets xnijawi ku ja Jesucristo y'øyi tyiyi, jøts kuwani xnijawidit nayide'en jøts ku pøn øy tiy yjaa'y'aty, ja'ats ja Dios u'nk'ajtiyip.

3

Sa ja Dios x'u'nk'ajtyindi

¹ Ejx ja Dios Teety xjanchøjkyindi, jøts ja wya'añ ku ja x'u'nk'ajtyindi x'una'jk'ajtyindi, pø janch

jade'enxi adømdi. Pø patyimxi adøm ja ka'ødyumbi xka'ejxkajpyindi xkanija'windi kumi ka'ap ja t'ejxti tnijawidi pøni pøn ja Dios Teety.

² Migu'uktøjkti, tø dø'øn ja Dios x'u'nkpijkyindi xmaabyijkyindi; ka'anims xuknija'wa'andi pøni sudso njaa'y'ajtindit wiingyubety. Ja'ayi nugo nnija'wa'andi jøts ku ja Jesús ñankñigaxøøkwā'aniyi jadigojk, jøts jade'en njaa'y'ajtindit njujky'ajtindit nayide'en sam ja', pø yik'ejxpxi ja' sam idø'øn ja chøøni tyani.

³ Pøni pøn tjøp'ejxp jade'en, ja'ats nay'ejx'ejtip jøts ja pøky kyapaadit, jøts ja jade'en chøøniti sami Jesús wya'ats'atyin.

⁴ Jøts pøni pøn tundigøy'ejtp, ja' Dios kyutujk kyamøjpiktaajkidip, pø yø'øxi tundigø'øyin'ajtp ku ja Dios kyutujk kyayikmimadø.

⁵ Pø tøxi mee xnijawi ku ja Jesucristo ya tø myiñ naxwiiñ jøts adøm xyikpøkwyaajtsindit, jøts nayide'en xnijawidi ku ja janch wā'ats, ni tu'uk ja pøky tkamøødi.

⁶ Jade'en idø'øn, pøni pøn møøt y'ity ja Jesús, ka'ap ja jade'en y'ukpøktyun'adøtsnidi sam ja jaa'y pøn tkidyimñija'widip ja Jesús.

⁷ Meets u'nkti una'jkti, kidi nugo myikwindaa'yidi; pøn y'øyi tyi'byi tpadump, yø' idø'øn øy jaa'y'ajtip nayide'en sam ja Cristo y'øy'ajtin wya'ats'atyin.

⁸ Pønts ejtp tyimdyundigøøpy, ja miku' yja' pyaduujnidip, pø ja'axi jade'en tyiktso'ondaajk ja pøkyu'unin ja win'øø'nin. Paty idø'øn ja Jesús ojts myiñ jøts ja tyikudigø'øty ja miku' pyøkyu'unin, ja wyin'øø'nin, sa jaty ja y'adi'ich.

9 Ka'ap y'ukpøkyunidi pøn ja Dios u'nk'ajtniyidip, pø ja'axi kø'øm møøjyidip ja myøk'ajtin; paty ka' nugo y'ukpøkyun'adøtsnidi, pø Diosxi u'nk'ajtniyidip.

10 Yide'en'ampy idø'øn yiknijawi pøn ja Dios u'nk'ajtidip jøts pøn ja miku' u'nk'ajtidip, kumi ka'ap ja Dios ja tja'aji pøn ja myigu'uk tkatsojktip, jøts pøn tundigøy'ejttip.

Nachojkindip ja xem ja yam

11 Yø'øbi kajpxy yø'øbi ayuujk midi mee tø xnijawi ku ja m'øchinaa'yin xyiktso'ondaktøø, yø' idø'øn tyijpy ku nnachojka'andit nixem niyam.

12 Jøts ku ka'ap jade'en njaa'y'ajtindit sam ja Cain ku ja y'uch ja tyik'øøjky, ja' pyadumpy ja miku' yja'. ¿Ti ja tyuku'o'jkøø? Ja'agøjxp ku ja tkabaduñ ja miku'.

13 Meets migu'uktøjkti, kidi sa xjawidi ku mmi'ambøjkidit yø ka'ødyumbidi.

14 Tø adøm nmajtstuuptyindi yø ka'ødyunk jøts ja øchinaa'yin tø nbabijkyindi, jade'en idø'øn yiknijawi ku nixem niyam nnachøjky'andi. Pøni pøn tkawamp tkatsojpk ja myigu'uk, ja' pyadun'adichp ja ka'ødyunk.

15 Jøts nayide'en pøn tmi'ambøjpk tmijotmatp ja myigu'uk jade'en ja pyidsømni sa yikjaa'y'ookpi, pø mnija'wipxi meets ku ka'ap ja yikjaa'y'ookpi y'anmija'win y'ity xemikøjxp, windigøøpy ja'.

16 Nnija'windip sa Jesucristo xtsøjkyindi amumjoojt, paty adøm ja xku'o'jkandi; jøts nayide'en adøm ja xpaat'ajtyindi ndsojkindit ja nmigu'uktøjkti sam adøm tø nyiktsøjkyindi sam adøm tø nyiku'o'jkandi.

17 Pøni pønts jotkujk tyiknaxp, yja'ijxpy ku ja myigu'uk y'ayøwinmay, niwine'enin tkidy-imdya'ayo'ixy ja pyikta'aky midi ja myøøt, ¿sudsots ja nugo wya'añ jøts ku Dios ja twa'añ ttsøky?

18 Meets u'nkti una'jkti, ka'ap y'øyi ku nugo nwa'anindit jøts ku nmigu'uktøjk ndsøjkyindi; yø' ne'egi øy ku ndyimbyadu'unindit tiy janch. Yø'øts jade'en wingaxø'kp ku ja nachoki amumjoojt yik-møøt'aty.

Sudso jotkujk nnayja'wa'ant Dios wyingujkp

19 Jade'en idø'øn yiknijawi jøts ku nbadu'uñindi ja tyiibi ja yjanchpi, jøts jade'en idø'øn niti ngagumaa'yindit Dios wyingujkp;

20 kuts kø'øm nnañi'øø'na'andit, ku nmaa'yindit ndajindit ku ja Dios tø x'u'nkpijkyindi, pø kø'ømxi ja jade'en tø xtsøjkyindi jøts møj ja', ja' tuki'iyi tnija'wip sa adøm njawinmaa'yindi.

21 Jøts ku ngamaa'yindit ngatajindit winets ngatsø'jka'andit jam Dios wyingujkp.

22 Ja' adøm tuki'iyi xmø'øyindip ti jaty adøm n'amidowa'añindip nbøktsowa'añindip ja'agøjxp ku nbadu'uñindi sa ja x'ane'emyindi pøni sa ja ttsøky.

23 Yide'en idø'øn ja y'ana'amin ku njanchja'windi ja y'U'nk Jesucristo, jøts nayide'en nachojki'indit nixem niyam sam ja Jesús kø'øm xa'ane'emyindi.

24 Pønts jade'en tjanchpadundip ja y'ana'amin, ja'ats ja Dios tmøøt'ejttip jøts ja nayide'en myøøt'ityidi. Jade'en'ampy nnija'windi kudam ja tø xuktatøjka'andi ja y'Espíritu Santo jøts ja jade'en kø'øm xmøøt'ijtyindi.

4

Ja Espíritu Santo jøts ja' midi tkaminamyaa̱jyip ja Cristo

¹ Mee migu'uktøjkti, kidi nugo xmibøjkti ja jaa'y pøn wandip jøts ku ja tnigajpxidi ja Dios y'øgyajpxy ja y'øy'ayuujk, ejxti yikxon pøni janchpi tyiiby i dø'øn ja kyajpxtip, pø may adøtstipxi ja jaa'y ya naxwiin pøn windaay'ajttip.

² Yide'ents meets ja xni jawidit: ja' idø'øn ja wyinatyi pøn tjanchja'widip jøts ku Jesucristo ya y'atsnanky'eixøø tyimyjaa'yin, ja'ats idø'øn ja Dios Teety møøt y'ity.

³ Pønts jade'en tkamibøjki ja Jesús, ja'ats idø'øn ja Dios Teety kamøøt'ejtiyip; ja ka'øwyinmaa'n ja ne'egi yiktumpy midi tkaminamyaa̱jyip ja Cristo. Tøxi xnimadowdi jøts ku ja mye'ent ja ka'ødyumbi øy juuni; tøts idø'øn ja yjanchmiin, pø jaanixi ja wyinmaa'n ja ya naxwiin.

⁴ U'nkti una'jkti, Dios mee mja'ajttip, tøxi xmimajada'akti pøn mwindaay'atwajnidip; pø tyimyøkxi ja' pøn mee mmøøt'ejtiyip jøts nika'ap ja jade'en myøki ja ka'ødyumbi yja'.

⁵ Ja' ja nugo tyunk'ajttip ja ka'ødyunk ja ka'øwyinmaa'n paty ja tum jap ttuk'ixpøkti ja jaa'y jøts ja jade'en yikmø jawidit.

⁶ Diosts adøm xja'ajtindip jøts ja xmibijkyindi pøn jaty ja Dios møøt'ejtidip. Ja'ats xkamibøjkindip pøn kamøøt'ejtidip ja Dios; jade'en'ampyts nnija'wa'an pøn tpadundip ja y'øybi ja tyiiby i jøts pøn tpadundip ja taay'ajtin.

Dios amuum ja tsojk'ajtin myøøt'ajtpy

7 Mee migu'ukti, xpaat'ajtindip ejtp nixem niyam nnachojkandit, jabi Dios wyingujkpxi chøøñ ja øchojkin. Pøn ja myigu'uk ttsojkp, pøn ja myigu'uk tpa'ayoop, ja'ats idø'øn ja Dios tjanchja'wip jøts ja jade'en y'u'nk'atyiyi.

8 Pøn tkatsojkp tkaba'ayoop ja myigu'uk, ja'ats tkidyimyjanchja'wip ja Dios, kumi ejtp ja Dios ttsøky ja jaa'y, ejtp ja tpa'ayøy.

9 Jøts adøm ja ojts xani'ejxa'andi sa ja xjanchøjkyindi xpa'ayø'øyindi ku ja tyu'umtspi U'nk ja ojts xaniguejxyindi, jøts ja øchinaa'yin xmø'øyindi y'oo'kingøjxp.

10 Yide'en'ampy idø'øn ja Dios chojkin ja pya'ayo'owin y'ejxi tyiyi: pø nigidi adømxi ja tøndsojkyindi nba'ayø'øyindi jawyeen, pø ja'axi adøm kø'øm tø xtyimchøjkyindi jøts ja y'U'nk ja xaniguejxyindi jøts ja xku'ayo'owandit ja nbøky.

11 Migu'uktøjkti, pøni tødam ja Dios xtsøjkyindi, ti kuts adøm nganachøjkyindi nayide'en ja xem ja yam.

12 Pøn ja Dios tø t'uk'ixy, nipøn ja tka'ixy; pøni nachojka'andipts nabya'ayo'owa'andipts nixem niyam jade'en ja xmøøt'ijtyindi jøts ja jade'en njaaktyimchojkint.

13 Nnija'windip ku ja Dios møøt n'ijtyindi jøts xnamyøøt'ejtindip ja nayide'en, ja'agøjxp ku ja tø xuktatøjka'andi ja y'Espíritu Santo.

14 Tø øøts n'ixy, tø øøts nnijawi wemp'am, paty øø nwa'añ jøts ku ja Dios Teety tø tjanchkexy ja y'U'nk yiknitsokpi ya naxwiiñ.

15 Pønts tjanchja'wip jøts wya'añ ku ja Jesús Dios U'ngi, ja'ats ja Dios tmøøt'ejtp jøts nayi møøt'ejtip ja nayide'en.

¹⁶Jade'en'ampy adøm ja tøm nija'wa'andi jøts ku
xjanchøjkyindi xpa'ayøøyindi ja Dios. Pø ja'axi
ejtp tsojkp, pø ja'axi ejtp pa'ayoop; pønts ja tsojkin
yikwingaxi'kpy, ja' ja Dios møøt'ejtip.

17 Ku jade'en nbadu'unint, jade'en ja
nyikmøjtaajkint ja øwyinmaa'n, jøts ja jade'en
ngawingudsøjkant ku ja mye'ent tiidyumbi;
ja'agøjxp ku ja nayide'en xukwinmaa'yimp ja
tsojkin ja pa'ayo'owin sam ja xtsøjkyindi sam ja
xpa'ayø'øvindi.

18 Niwine'enin ja Dios chojkin ja
Dios pya'ayo'owin xkayiktsø'jkandit.
Yjaaktyimiyiktigøøgyijxpy ja tsø'øgi ja ne'egi, jøts
pø yiku'ayo'owipxi ja tsø'øgi ku pøn chø'øgi, ja'ats
idø'n tkayikmøjtøjkipnim ja Dios chojkin ja Dios
pya'ayo'owin.

¹⁹Ja'agøxp adøm ja Dios ndsøjkyindi kumi jawy-
een ja jade'en tøsøjkyindi.

²⁰ Pøn nugo wamp: “Ndsøjkpy øts ja Dios”, jøts ni ka'animdĩnts ja myigu'uk ja twa'añ ttsøky, ja'ats idø'øn taayip. Sudso'ampyts ja Dios tjaaktyimchokt, pø ka'axi ja kyaxi'iky, ti ja' net ja yjaaktsokp pø ja myigu'ukxi ja kyatsøjkpy pøn yja'iixpy wiin'ajy.

²¹ Jøts ja Dios yide'en xmo'øyindi ja y'ana'amin:
pøni pøn ja Dios ttsojpk, nayide'en ja myigu'uk ja
twa'ant ttsokt.

5

Sudso'ampy ja ka'ødyumbi yja'
xkamimajadaajkint

¹ Pøn jaty tjanchja'widip ku ja Jesús yikejxy ya naxwiiñ yikniṣokpi, ja'ats ja Dios Teety u'nk'ajtiyidip; pøni chojktip tam ja Dios Teety jade'en, nayide'ents idø'øn ja ttsojktit tpa'ayo'odit pøn jaty ja Dios Teety y'u'nk'ajtpy.

² Kuts ja Dios ndsojkindit jøts ja jade'en ndyimbyadu'unindit sa ja y'ana'amin ja wya'añ, jade'ents ja nnija'wa'ant ku ja nayide'en ndyimchøjkyindi pøn ja yja'ajtpy.

³ Kuts jade'en ndsojkindit ja Dios, ja' idø'øn ja tyijpy ku dø'øn ja y'ana'amin nbadu'uñindi, jøts ka'ap ja mabaat chepi.

⁴ Jøts pøn jaty ja Dios møøt y'ity, ka'ats ja tmibøjkidi ja ka'ødyumbi yja'. Pø paty ja Dios janchja'win xuktamajadaajkyindi jøts ja xkadukmibijkyindi ja ka'ødyumbi yja'.

⁵ Pønts tkamibøjkti ja ka'ødyumbi yja', ja'ats idø'øn tjanchja'widip ja Jesús jøts ku ja Dios U'ngi.

Ku ja Jesús yikniḡajpxy ku ja Dios U'ngi

⁶⁻⁷ Nnija'windip adøm ku ja Jesús Dios U'ngi, jabi kø'ømxi ja Dios Teety ja tyimñiḡajpxpy ku ja Jesús ñøbejty jøts ku nayide'en wyinaty y'ookwaanimi; jøts ja Espíritu Santo ejtp nayide'en tniḡajpxmi, jabi myøøt'ajtpy ja tiy'ajtin ja'.

⁸ Tigøøkts adøm idø'øn ja ejxpajtin nmøøt'ajtyindi midi tniḡajpxtip ku ja Jesús Dios'u'nk'aty. Ja myidu'ukpi, ja Espíritu Santo kyajpxy y'ayuuḡ ja' midi xuknija'wandip ja tyiiḡy ja yjanchpi. Ja myimajtskpi, ja Dios Teety y'ayuuḡ ja' midi yikmadoow ku ja Jesús ñøbejty; jøts ja myidigøøkpi, nay ja Dios Teety y'ayuuḡ ja'

midi yikmadoow tsajpjøtpy kyida'aky ku ja Jesús wyinaty y'ookwani.

⁹ Sa ja jaa'y tyiy'ajtin ngupijkyindi, ¿ti Dios idø'øn ja tyiy'ajtin njaakidyimgyupøjkin? Pø ja'axi jawaani tyimdyiy tyimyjanch ku ja tñigajpxy sa ja y'U'nk ja yjajty kyubejty.

¹⁰ Pøn tjanchja'wip ja Dios U'nk, kø'ømts ja tjā'gyuki ja tiy'ajtin; jøts pøn tkajanchja'wip ja Dios ku ja tñigajpxy sa y'U'nk yjajty kyubejty, ja'ats taadyejp ja Dios.

¹¹ Ya'at tiy'ajtin xuknija'windip jøts ku Dios tø xmøø'yindi sa n'anmija'win xemikøjxp yjujky'ajtindit, ja y'U'nkts ja'abi jujky'ajtin tmøøt'ajtp.

¹² Pønts møøt y'ity ja Dios U'nk, yikmøøpyts ja'abi jujky'ajtin ja'; jøts pøni ka'ap jade'en yikmøøt'ity, niwindem jade'en ngapaajtindit ja'abi jujky'ajtin.

Ku ja kajpxwejin jøts ja kajpxpoo'kxin y'ukyikyajkni

¹³ Ya'at mee ndanija'ayip wine'enin jam xjanchjawidi ja Dios U'nk, jøts xnijawidit ku ja jam xmøøt'ajtnidi ja jujky'ajtin midi xemikøjxp.

¹⁴ Jade'ents ngawingudsø'jkindi ja Dios ku n'amido'owin nbøktso'owin pøni ti ja kø'øm xamidsojkindip, ja' ja myadøøpy.

¹⁵ Tøts inet nnija'windi ja Dios kudam ja tmadøy ja amido'owin ja pøktso'owin, jøts nay jatyi x'adsowimbijtyindi pøni ti dø'øn tø n'amido'øyindi.

¹⁶ Pøni n'ijxyindip nnija'windip ja nmigu'uk ku ja ttundi ja pøky midi ttukja'dyigøøpy ja Dios, jatyi'ts ngu'amidoo'wandit jøts ja Dios ja myaa'kxukiyit. Jabi jaaxi ja kajabøky midi

ja anmija'win tyikwindigøøpy jøts ja Dios tyukja'dyigøy, kidi ja'apts ndijpy.

¹⁷ Tumbøky yø tundigø'øyin kajpxigø'øyin; jamts ja winaagin midi tkayikwindigøøpy anmija'win.

¹⁸ Nnija'windip̄ts ja' pøn ja Dios Teety møøt y'ity, ka'apts ja pøky'agujkpy chøøni; pø Dios U'nkxi axajtujkiyip jøts ja miku' ja sa kyatuniyit.

¹⁹ Pø nnija'windip̄xi adøm ja' ku adøm ja Dios xja'ajtyindi, jøts may ja'amidi pøn ja miku' tø ñiwangøjxniyidi.

²⁰ Jøts nay yiknija'wip ja' ku ja Dios U'nk tø xnimii'ñindi, jøts ja tø xuknija'wandi midi tu'ugyi ndios'ajtyindip. Ja' tu'ugyi møøt n'ijtyindi ja y'U'nk Jesucristo. Ja'ats idø'øn tu'ugyi ndios'ajtyindip, ja'ats tyajkp jøts ja n'anmija'win xemikøjxp yjujky'ajtindit.

²¹ U'nk una'jkti, nay'ejx'etiyidi yikxon, kidi nugo o ti xdiospikta'akti, kidi jade'en o ti xwindsø'øgidi. Jade'en idø'øn ja yjatt.

Ja øgyajpxy ja ømyadya'aky midi xukpaajtimp ja nitso'ok'ajtin

New Testament in Mixe, Tlahuitoltepec (MX:mxp:Mixe, Tlahuitoltepec)

copyright © 1987 Wycliffe Bible Translators, Inc.

Language: Mixe, Tlahuitoltepec

Translation by: Wycliffe Bible Translators, Inc.

Mixe, Tlahuitoltepec [mxp], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Tlahuitoltepec

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 19 Dec 2025 from source files
dated 29 Jan 2022

422dcf73-46a5-5403-b423-8406ed76ac1d